

後記序


5563.8
2924
v.6

臨齋集

卷六

廿七





臨齋先生文集卷之十二

序

孔川遺稿序

丁巳

大東治教之隆垂五百年而風化所扇人文苑流遐
方草莽之間往往出魁梧奇特士孔川裴君泳亦其
一也君氣豪才良志尚超羣早謝功令業能毅然以
爲己之學自期主忠信敦孝友所讀皆賢聖書而尤
致意於心近小學於紛華勢利之場泊如也嚴於律
身謹於辭受其處心制行一以古人爲準不隨俗低
昂余何詳焉得於鄉黨間月朝者乃爾曩於鷺江函

丈間始目其貌耳其言益信昔聞之爲不誣而恨相
識之晚也轉眄之頃其人已不可見惟其書在以其
人之忠閱其書尚可以得其心則卽心而優其人也
將不朽君其在斯歟所著述何其尠也豈敦本務實
之工有不屑於文辭爲歟零金瑣羽彌可珍焉而告
其考妣文一篇尤足以滋千古孝子之淚此君之所
以爲君歟如使假之年而卒其業則所造就豈止是
乎惜乎讀書四十年無所遇於世卒窮餓而死名湮
滅而無稱噫其可悲也已然人之爲學如夫耕婦織
依本分當爲卽爲非要見知於人人之知不知亦何

與於君哉韓子曰不有遇於今必有遇於後後之篤
論之君子亦將有所取於斯歟金懼菴永奎以君交
好收書編之爲久遠圖其義固已感人囑序於余余
不之辭者亦竊感君之爲人焉聞君歿也貧無以殯
歟其故舊諸人贈襚以庀之其妻子之無依能悉心
以周之其慕范巨卿郭元振之風者歟亦可見君平
日學力之所入人者深也今其庄在孔巖孔巖迺君
從師講業之處云爾

肅齋趙公六十一歲壽序

上之十一年庚申二月旬有八日卽肅齋先生趙公

六十一歲攬揆之辰晬辰祝嘏非古也而若先生之
壽之爲邦國之光吾道之慶其爲辭而頌禱之烏可
已也贊奎罔克躬造尊所敬稱一觴乃敢西向再拜
謹爲之言曰壽者生人之至願也夫壽而後天下之
萬事可做人間之五福可享已有定於賦生凝命之
初豈人人所易以願而可得者哉然或得之而無令
德以將之其爲壽也勞辱已矣又奚用壽爲哉且命
焉而戕之則牯生養之則延歷詎徒以龍虎鼎器爐
火密室之功云爾乎先生稟陽剛直正之氣以四勿
九容爲攝生要訣以四子六經爲修鍊真諦道腴積

於內德潤胖於體以至德邵年高如松栢獨茂如蒼
龜益靈則先生之壽其亦異乎人之爲壽而所謂仁
者壽而大德必得其壽者非爲先生今日道也耶先
生旣斯有壽之道矣行將見耄而耄耄而期頤而牖
羣蒙而躋一世於壽域惠後學而壽道脉於無垠以
先生之壽爲吾道之壽以吾道之壽爲天下國家後
世之壽則其爲壽將有無窮旣矣先生之自任自期
顧不重且大歟詩曰樂只君子萬壽無疆謹以是爲
先生祝而以至于國家後世吾道之祝焉

巡相徐公

憲淳

六十四歲壽序

聖上卽除元年甲子臘月旬有七日乃巡相徐公六
十四歲攬揆之辰而不爲豐豫之舉者卽倍悲之義
亦以方喪爲防範也公按嶺再周歲嚴明而豪猾屏
息綜核而幽枉畢伸保民也則爬櫛其瘡疣衛正也
則闢廓其設淫治成化洽蔚有著績上而有彌勉
旬宣副予南顧之教下而有於我信處無使公歸之
願而迨茲稱觥之日端佐賓親羣黎百吏咸有頌禱
焉贊奎拜手揚觶亦不能已于言昔陳恭判亳州值
壽日親族皆獻老星圖侄倬獨以范蠡圖爲獻陳公
卽日納節明年致仕君子美之然竊嘗以爲陳公之

在宋朝也其去就不甚爲世重輕而年亦至矣欲去
則去何所難也若今日公之所處有自異於陳公者
以國朝五百年喬木世家早齡蜚英高步天衢負
一代山斗之望其義則休戚與同其任則進退有關
贊奎雖欲以世修圖爲獻烏得焉然則所可獻者老
星圖耳詩云以介眉壽夫壽者酬也天必有酬公者
矣公之立朝臨民清直著望清則神守直則氣完氣
完而太和流神守而天光發盎粹面背施諸四體韶
顏鶴髮氣歛華澤而公於是乎壽矣將見春秋彌卽
歸然爲一國之大老如景星之麗天如喬嶽之載地

致君民於熙皞壽國脉於無垠豐功偉績輝映青史
則公之壽豈但爲邦家之耿光哉抑亦爲天下後世
人之壽也然而禮著致事之文國有引年之典所以
優老養廉勵士夫之風節者也待到國家泰平教化
休明之日公之年亦至耳乃能懸車束馬退老江漢
之上翫禽魚而樂性靈則往哲之蹈榮名而保終吉
都貴勢而躋遐耆者於此焉在矣豈不爲聖世之
盛事乎于斯時也贊奎登堂稱觴拜獻五湖圖未爲
晚也

景仰契序

丁卯肇夏

昔先師梅山洪文敬公講道鷺湖一世豪傑之士多出其門而肅齋趙公全齋任公實得其傳焉則關以北遊從之士蓋多萃於其門迺與同志之未及門而徒景仰三先生之道者日相聚講磨而謀以修禊名其帖曰景仰其志豈偶然哉欲學其道得其傳傳諸人人而將有以幸家國與天下也洪理禹文杓甫同門舊要逶迤數千里訪余於達城之守東齋說斯事甚詳歸又以書來屬余叙之以余平日樞衣之久服習底道理說有可以警勵人者噫余非其人曷敢言爲雖有言豈有副其勤意者哉然遊三先生之門

躬瞻光靈之像親承提掖之教則其得之觀感者必有彷彿焉而乃若不及門而徒景仰也者將何所據依而貌狀之哉不幾於水月捉影乎余於是乎不得不明言其不然者矣夫聞風而來見面而去徒循從師取友之虛名者滔滔皆是其於三先生之道果能學之而得之者亦復幾人不有以心爲師尚友古人者乎三先生之道卽朱孔舜堯之道也載之經而著之書得其書而口誦心究肅然雷然感發而興起若先生之儼臨而警咳之在耳焉則其於學三先生而得其道亦庶幾矣何憂不朝暮函丈乎何必親炙之

爲貴乎孟子歷叙衆聖之統而曰我私淑諸人今諸
賢之未及先生之門者不啻爲私淑而得其傳也余
將東遊金剛登萬二千峰俯觀東海風濤之壯過
聖祖肇基之地歷覽肅慎氏故都上長白山吊古宋
二帝墓仍與諸君子相會講先師新刊之書證謚其
心法之傳而謂吾師文敬公之道傳於是云爾矣

南陵序

朴公龍德。丁卯黃梅節

南陵古之笙詩無以考其名篇之義今於朴公號亦
不知其何所取義第余一諗之日朴公贈余守東齋
詩一律調格高古辭致恬澹味之悠然有餘味固已

服其詩之如其人矣而下方署號銜乃向所願一詒
之南陵也曰倘非以因地名之偶爾者而取諸抑亦
如東坡之爲稱南豐之爲號歟曰否非是也曰然則
其得之於三百篇之遺音歟儀禮鄉飲酒及燕禮鼓
瑟而歌鹿鳴四牡皇皇者華然後笙八奏南陵蓋歌
者皆有詩笙者獨無詞無詞而有聲如今之琴譜也
禮壞樂崩不講久矣果能因其事而識其聲識其聲
而知其義歟其不能然矣則奚所據於南陵而取以
爲自號也南陵默然而聽悽然眶滋久而後言曰子
不見夫束皙之補亡詩乎南陵此孝子思親之詩也

其詞切悲而感人之深獨於吾甚焉吾髻亂而失怙
特煢孑殘喘寄死一世無往而非孤露之所爲感無
日而非風樹之所爲悲而吾之南陵卽王哀之蓼莪
也吾以爲號用寓終身之慕而且有一焉南陵非逸
詩乎吾亦工於詩者而至今白紛如無所遇於世是
亦逸詩也南陵之爲吾號子尚何恠之爲乎余惟其
言於南陵本旨未知果得乎否而亦不害爲孝子寓
慕之一道又悲其白首抱書有悒悒不得者焉遂識
其說爲南陵序

送黃父吉在恒歸小白山序
丁卯黃梅節

安豐之大小白世所稱神臯福地千峰翠嶺萬壑周
遭淑靈和清之氣委積其間而道學節義瑰瑋倜儻
之士多出焉處則遯淪無憫濩藏不市出則發揮事
功立名當世者在古凡幾人矣乎未知今亦有在否
乎吾友黃白農久吉甫端飭士也氣貌雅靜言談有
趣接之薰然有襲人者固不易得之人也治文詞爲
舉子以擅名爲場屋之雄何哉山川風氣非有殊也
而古今人同不同寔未可知也噫豈以舉業爲少之
我而然爲是業則不得不有求於世無尤僂無得也
且求之而真有可得者乎白農棲遑幾十年有何所

得者耶未若盡棄其學而學古之道深藏於白以待
立名當世如古人可也行矣高謝人寰翛然成痼霞
之舉山不厭高水不厭深耕於白樵於白欣然處之
而若將終身焉則異日者聞小白之山有隱君子出
焉吾必曰白農其人也

海史序

乙卯四月十六日

有以海史號而問其序者余復之曰白一六生成九
垓八紘僊一海上浮芥物矣則海莫鉅矣自結繩來
五千餘年之事不勝其汗青矣則史熱鬧矣取之其
莫鉅與熱鬧者而曰海史也者不已誇乎司馬子長

喜遊名山大川而一部史於是焉在子亦觀於海而將著史者歟方其萬沒不揚淪漣恬息涵混太虛潮汐順氣此聖世熙皞底氣像而唐虞三代史是已若夫驚濤撼天靈怪噴薄駭鯨出沒此叔李光景而秦漢以後史是已子將海於史歟史於海歟顧今四海陸沉泣隣之史無地可讀乘夫子桴蹈魯連海觀赤日出而想像秀夫不死之心歸而著史藏諸一片海堧乾淨地以俟後世焉則吾謂子不負海史號云爾矣

子將行矣行路難子其慎旃哉子所發軔著跟乃天下古今所共由之道遵道而行必如夫子吾不能已矣焉則畢竟並驅一轍聖賢同歸若一差路頭便卽崍羊腸纂蕪而茅塞之蹄跡交而豺狼橫擗墮冥行如楊之泣歧阮之哭窮皆鄒聖所訓捨正路而不由者也哀哉之歎不其然乎不有參天關嶺限於其間乎抽關啓鑰努力攀躋自有前程奇觀詩云周道如砥其直如矢子其行矣其慎旃哉守岡病僮贊奎書

八下序

癸未蝸節

夫人之欲上上之心無時而或忘忘之其於人可庶

幾矣乎吾宗錫止字極顏少儻不羈愛朋讌好施
與有不可於義者見輒愕然風生嘗游藝於射射命
中工吟安軼唐善臨池逼晉而皆不屑焉旣落魄不
遇居然老白首矣顧無慕於當時之榮亦何意於後
世之名哉歸隱於八公山下自號八下人或疑之者
謂棲於斯樵於斯耕於斯人人皆是已子何獨著題
目耶曰否否旣居是山下卧是雲下吟則梅下醉則
菊下風乎松下濯乎溪下步於月下而吾乃百不肖
似爲人之下也八下之爲吾號不其宜乎余惟極顏
之爲人非下於人者而其言乃爾蓋無欲上人之心

而於人有所警者以誌之

鄉飲酒禮序

辛卯

禮者在天成象在地成形而蘊之爲德履之爲則亦在乎人故曰教訓正俗非禮不備 聖上二十有八年辛卯東蓮李公按節嶠藩出治施教咸以禮讓嶺之人士翕然相賀蓋置身於利害毀譽之外束世於禮義廉耻之中此公之志也迺於端陽月戊子設鄉飲禮于觀德堂斯禮之舉久矣逸休堂李公翺旣行之於前尹止軒光顏李鍾山參鉉諸公繼之於後數公者或令聞被後世或聲望重當時賢人君子之用

心於教化者不謀同規前後一轍公之爲是也宜乎
舉焉而莫之自己也然玄酒太羹非時俗之可口黃
梓土鼓非九品之盈耳而其澹泊之味希古之音有
可以回淳返朴裨風化植世程用造三昔之舊俗庶
有望於今日夫教入者養其善心而惡自消治民者
教以敬讓而爭自息斯禮所以行之家鄉施之邦國
達之天下後世而無所處而不當也非識時務達治
體君子而好禮者其能之乎贊產癰朽龍鍾分甘世
棄而猥荷戒速獲睹盛禮旣葵陵揚言于衆曰行此
禮而徒區區於節文度數之末有司事也苟不濫究

叙其事而繼韻語謹拜手以獻用備異日故事云爾

東蓮李公餞別詩集序

癸巳春

嶺巨藩也秦雍風土鄒魯儒化而民物之蕃租賦之
盛冠一國國家所恃以爲重固其所也由是寄任之

心於教化者不謀同規前後一轍公之爲是也宜乎
舉焉而莫之自己也然玄酒太羹非時俗之可口黃
桴土鼓非九品之盈耳而其澹泊之味希古之音有
可以回淳返朴裨風化植世程用造三昔之舊俗庶
有望於今日夫教入者養其善心而惡自消治民者
教以敬讓而爭自息斯禮所以行之家鄉施之邦國
達之天下後世而無所處而不當也非識時務達治
體君子而好禮者其能之乎贊奎癰朽龍鍾分甘世
棄而猥荷戒速獲睹盛禮旣奏陵揚言于衆曰行此
禮而徒區區於節文度數之末有司事也苟不濫究

其義詳致其實其於正身安國何補焉夫焉用禮爲
哉士之自任至大而不安於小成所存至重而不局
於近用出則端笏巖廊一國興讓處則浚衣幅巾朝
翔丘園無負我公導率之至意焉則數千里禮樂之
邦五百年禮義之俗其將永有辭於百世而不淪胥
爲難緇之域安知不權輿于今日乎髦士乎勉旃哉
叙其事而繼韻語謹拜手以獻用備異日故事云爾

東蓮李公餞別詩集序

癸巳春

嶺巨藩也秦雍風土鄒魯儒化而民物之蕃租賦之
盛冠一國國家所恃以爲重固其所也由是寄任之

心於教化者不謀同規前後一轍公之爲是也宜乎
舉焉而莫之自己也然玄酒太羹非時俗之可口蕢
桴土鼓非九品之盈耳而其澹泊之味希古之音有
可以回淳返朴裨風化植世程用造三昔之舊俗庶
有望於今日夫教入者養其善心而惡自消治民者
教以敬讓而爭自息斯禮所以行之家鄉施之邦國
達之天下後世而無所處而不當也非識時務達治
體君子而好禮者其能之乎贊奎癰朽龍鍾分甘世
棄而猥荷戒速獲睹盛禮旣葵陵揚言于衆曰行此
禮而徒區區於節文度數之末有司事也苟不濫究

緒言

一自成案之凡四冊之樣不一難於參考難便且或

有散迭之慮故粵在乙亥春以案全一冊之

意公議齊裝而雖未果然在今仲夏翻本

就儲編第壹冊差夾幸未案錄負以此恕覽焉

凡例

一但依逐年條已定之案而書之年

則事經更訂

一序齒從當一體而第本不書生年之人間或有

差夾處南以此恕覽焉

案

一以年遠而次之而存本不書生年年中者差

案及故至順焉

心於教化者不謀同規前後一轍公之爲是也宜乎
舉焉而莫之自己也然玄酒太羹非時俗之可口糞
梓土鼓非九品之盈耳而其澹泊之味希古之音有
可以回淳返朴裨風化植世程用造三昔之舊俗庶
有望於今日夫教人者養其善心而惡自消治民者
教以敬讓而爭自息斯禮所以行之家鄉施之邦國
達之天下後世而無所處而不當也非識時務達治
體君子而好禮者其能之乎贊奎癰朽龍鍾分甘世
棄而猥荷戒速獲睹盛禮旣葵陵揚言于衆曰行此
禮而徒區區於節文度數之末有司事也苟不浚究

一、年止、方次、書之、而^力生、年、力、考、以、方、順、方^生、年、
墨、以、考、以、方、順、方

重非素重臣不爾也

上之二十八年辛卯春東運

李公光膺簡心按節莅嶺觀察山川風氣謠俗旣而
曰治以教化爲本不務其本雖欲言治皆苟而已於
是頒行鄉約於七十一州舉鄉飲鄉射禮又月課諸
生講業期年而化大行州府郡縣之長恪勤率職民
皆安其所樂其業熙熙不知其所以如游魚之忘江
湖蓋公之爲治不務皎皎之績不要赫赫之名而所
謂日計不足月計有餘則其必久而不能忘者在人
心也癸巳三月公將解節還朝士農工賈婦孺隸
兒咸惜其去齋咨涕洟奔走於祖道之側儒士百餘

負進餞於琴湖境上亦古未始有也詩不云乎無以
我公歸芳無使我心悲方其巔民之謂歟諸儒皆有
詩聯篇工拙靡暇顧俟蟲時鳥自鳴天機者何妨於
各盡其情也哉以贊奎亦嘗周旋於飲射讀法之筵
受知於公深要一言弁之其亦不可以已乎知其不
可以已也遂爲之序

永川李氏泐譜序

甲午二月

永川李氏泐譜李君基洙應八譜其泐之族也應八
甫之言曰吾永李寔平章事諱文漢后也代數失脫
以麗朝永陽君諱大榮爲鼻祖者謹譜系之道也傳

至六世而爲六派以明其子孫所從分也六派之分
今且五百餘年而子姓蕃衍散居一國者指不勝擣
則後屬已疎且遠矣由疎也不相攝由遠也落難合
合修舊譜恐無其日而派譜所以作也南谷公諱釋
之孫忠莊公諱甫欽殉節於 莊光之際吾祖副使
公諱甫款忠莊公弟也當時禍變爲世忌諱父子改
名遯跡大邱吾派譜所由始也掛鞭堂諱榮副使公
之玄孫也願乞一言以識之不佞癡癡不能修辭辭
不獲則竊以爲五岳祖乎崑崙而東岱西華分鎮一
維九河源於星宿而夾馬釜瀾各成一流夏書之導

山鄴經之記水雖各有歧分之處不害同本源之歸
何獨於人之世譜而不爾乎哉合族同譜固廣愛之
術各自分譜亦詳吾所自出庸何傷乎惟敦睦是勉
之哉遂爲識

長淵盧氏族譜序

譜者周官少史奠世系辨昭穆之遺規也去古既遠
宗法又廢別姓定系非譜無以也尊祖收族非譜無
由也故有祖斯有宗有宗斯有族有族斯有譜譜之
不能無作也其繫顧不重歟長淵盧氏中國范陽人
也有諱穗率九子東來以功分封長淵伯諱圻迺其

一也終麗之世世襲簪組久爲大東巨閥而至諱詠
遯于雲門山也顯王賜詩麗之云南飛仙鶴入雲門
刺借千峰別有園淪落當年看斗氣謾將閒脚躡天
根蓋其高蹈貞躡有介於宸衷也逮至本朝名德
相望清敏公之爲麗氏靖獻晚翠夢鶴兩公之淵源
正學主簿公之勲錄進士公之殉孝寔多可述而棄
軒沙湖暨道湖昆季諸公之文學世家固已難矣如
小心公不佞同門立雪夙艷名行苟無其先積累之
善爲之基本安有閱百世而不襲先懿如是其盛矣
乎盧氏世譜未及再修今且數世之久久則遠而易

忘將無所於稽無所於稽則無所於統是故程夫子以明譜系收宗族爲管攝人心之義諦盧氏之譜其亟修舉焉可已也盧氏啓洪與其族基燮方尸厥事啓洪述先慕賢之誠克趾祖武鄉黨有稱小心嗣子永欽問序于不佞辭以癘病而不獲則仍復于盧氏曰以一人而分爲千百人以一世而傳于千百世在千百人誠疎矣以一人觀之同是我骨肉舉千百世誠遠矣自一世舉之同是我一身凡吾所以望吾子孫疇不欲其不疎疇不欲其不遠乎以其望于子孫者待其祖先則百身而一心千世而一室何有乎親

疎遠近哉然則統五宗而睦九族繩先矩而貽後穀
孝悌之心油然而生者惟譜是已盧氏乎其欽念哉

小心齋集序

儒者之學學而至於道道也者維持宇宙之器仗也
循乎天理自然之則合乎人事粲然之備蘊之爲淑
善其身廣之爲彌綸天下皆是物也三粹以上道行
于時自羸而降道寄于書讀是書講是道而不過於
時則山林而已小心盧公自少志于道而酷好書負
苓於江漢之上先師文敬公梅山先生一見期謂蔡
重公之爲公斯可知已嗚呼皇霜屢換公之墓木已

拱不佞亦景迫淹熒歸巾待符追想舊遊風韻緬邈
公嗣子永欽攬撫其遺文幾局以不佞受知公浚謁
弁卷一言顧筆與心腐何以述焉公真心古貌風儀
峻潔篤志力踐內行純備條痕掌血窮格精密所謂
滾造自得左右逢原者其庶矣乎抱蘊不試竟窮餓
堪巖不見知而无憫豈不誠熙世之逸民南服之高
士歟睠今世級日卑異言滔天儒者之學幾乎墜地
如公眞實向裏刻苦其工鮮或見焉則歎吾道之益
孤恨九京之難作噫公之平日至論得於斲爛之餘
者靡足爲全鼎一臠後之人可能讀其書而知其人

歟公其不朽歟否乎可悲也夫

勸學遺訓錄序

己丑三月

夫木之根深者條達水之源遠者流長千章之材萬斛之波必有所本人奚獨不然有父祖之賢子孫類之余於禹君孝萬信之始余得君於儒宮講讀之筵已目寓之知其非俗下秀才既而從余遊益叩其所存皆經禮上宿功峨冠褰衣其容純如天花亂墜言論纚纚非其父兄之賢教以義方能一朝襲而取之乎日袖一篇書示之曰此先人平日勸誨小子之遺訓也顧無所成就以答父母恩收錄爲一書不忘爲

終身佩服而又將遺以示子孫勸也願邀一言以惠
之余受而讀之歛衽而歎曰旨哉訓乎孝哉禹也後
有續小學書者入之立教篇明矣禹乎推是心以往
其於造道乎何有莫以既得而自多莫以固窮而自
沮彌勉其所未勉益進其所未進恢廓擴克用極乎
高廣之域則立身揚名以顯其親而有是父有是子
矣靈芝醴泉豈無根源歟遂書以歸之

徐孝子

弼元

行錄序

丁酉

天地之大德曰生孝以順德報生之道也天之經地
之義人之所以爲人不在茲歟我朝立國五百年

敦風教植世程以之婉隆三粹皆是物也道齊之化
滂流溥洽雖閭巷之間往往有南陵之行卓然可述
若星之茶山徐孝子其人亦其一也孝子已自五歲
時著稱於孝人皆不名而稱孝子先輩長德旌述備
至苟非根天之誠有以感人潑者其如是乎蓋其雪
田有菜風浪得魚大偷鱗而飛雉入室夢神告而鯉
膽合藥固非其感應之捷與造化酬酢古之孟宗之
笋王祥之魚一轍同歸人或疑其非常而適然者不
其傾乎然而九閭旣遽褒賞之典獨不及焉何哉盡
吾職分所當爲非有所爲而爲孝子之心也烏頭赤

脚炳朗門閭非不爲鄉里所艷觀而於孝子何有加
損焉載潤正源甫諸人出義於懿親推心於孝悌收
拾孝子事行將付剞劂氏而問序於余顧癢醜筆腐
無以闡幽而辭不獲則謹據前修撫實之語以勉其
後來之不墜厥緒用答天地大父母生成之大德云
爾

獨茂巖棲契帖序

辛丑

悅菴先生夏公講道琴湖上獨茂巖棲今且挽百許
楫公遊於宋性潭李鏡湖兩先生之門門路之真淵
源之正世所艷仰而江山古宅文藻垂空烟霞故洞

門墻久寂吾林慨惜厥惟久矣玉山張友柄志鼓山
任先生之高足也謀與同志共辦心香爲盍簪觀善
之會人孰不樂爲而成之哉旣而屬余叙其事余亦
聞悅翁之風而作者同并諒篤何以辭爲僉賢之聯
帖置名所以修禊事也禊者契其心也毋徒循其名
專用心其實課年一會先講八禮節要用作一身節
度夫身者百年物件禮者萬事儀則苟欲立身守身
如悅翁欲盡禮說禮如悅翁其於造道也亦足爲階
梯津筏而溯而上之紹述先賢闢域不難到耳苟如
是獨茂巖棲講道之盛安知不有光於舊日乎而吾

廷將彬彬焉爾矣是爲序

警惰齋遺集序 壬寅

夫觀人先觀其師友其人斯可得矣一國之善士斯友一國之善士天下之善士斯友天下之善士鄒聖之訓蓋爲是發歟無惰之里二水三山靈淑之氣鍾於人而警惰具公出於其間天分高邁器度凝遠文行德義爲一時所推重而陶菴李先生嘗錫號以警惰公之爲公斯可見矣并世從遊如寒圃齋李文忠公踈齋李忠敏公二憂堂趙忠翼公及一代諸名勝皆樂與之交唱酬諸篇歷落在零稿敗牘之中使人

調誦起敬摩挲不已非警情公蓋未易及此况又栗
牛沙三先生辨誣從祀諸疏尤菴先生蓬山奉安其
文固非衛正崇道之風義得於躬行滾造之餘其爲
詩渾澹天成閒遠古潔而寂寥殘編收拾斷爛者未
一齋於全鼎矧其嘉言善行之可傳於世者安保其
存而無泯也可惜也已後之觀公者觀於師友之間
則庶可以得公矣

鶴泉亭青標錄序

士寅

仙遊洞之鶴泉亭文正公陶菴李先生受真所也先
生杖履所臨山水處何限必於斯創焉以地接華陽

形勝相伯仲歟讀 萬東廟碑先生之志槩可想已
詎但地勝爲也夫尊攘大義孔朱宋三聖賢單傳
密付而陶翁之導述而講明之者亦惟是已噫地之擅
勝亦有遇焉濂溪之於周子武夷之於晦翁千古其
遇嶽瀆鍾靈草木含馨而顧今天地純坤函夏腥羶
精彩遺芳之地置在何等境界一片乾淨在我東土
華陽仙遊對峙於一舍之近大讀春秋其有地歟地
之有遇其亦幸歟氣數推攷其無幸歟未可知也凡
我僉君子同修此錄者勿以聲音笑貌以先生之心
爲心遊藝於斯講道於斯使吾儒家授受義諦不墜

於地則始不負先生牖後之至意也蓋相與勗之哉
淵齋宋公嘗躬臨講席繼有記焉亭之廢興顛末泉
石奇壯述之備矣今不敢贅尸其事者李寅九克燁
甫苦誠所湊是可書也

學楔序 癸卯端陽節

夫此楔之設出於好善樂義好善樂義根於天性人
孰無是心而真能用心於此者蓋或鮮焉則敦風淑
俗無從以得互羣彥之有心於此而汲汲乎修楔也
然而羣彥之推重於鶴皋其必有可好之實而鶴皋
之逡巡退讓亦足以來羣彥風義之篤也學以名楔

則當彌勉問學之功同稷羣彥曰趨於善使他人之
好如羣彥之好鶴臯則孟子所訓好善優於天下者
將於是乎在矣鶴臯金君公純號也少日以功令業
擅場屋之雄旣不得志則回心向裏有志此事然淹
滋急景自有道遠之歎一乃心力向上做去自無媿
於豎拂是則公純之所自勉而用副羣彥好善樂義
之苦心也公純乎其欽念哉

正峰集序

前修於義理見得正故秉得確說得慢觀於正峰先
生全公之爲栗牛兩先生辨誣從祀疏及丙午疏舉

諸事可知已是以人多公之氣節而亦以是多忤於時象剛大直方之氣有千萬吾往之勇所以能致此歟然公之遺集收拾於斷爛之餘者僅存十一於百千是可以不朽公哉德行本也文藝末也苟有其本文之多少不須論也不務其德而徒治其文以求知於人儒門之末弊也八波斯之市奇恠之翫眩奪人目而終非已有於實用何有哉不佞於公之遺文摩挲彌琬以文之以人而傳而亦可以文而得其人也公使四子從學於尤翁之門皆能延譽於當時傳習於耳雲尤可驗踐實之德如有源之流有根之葉也

公八代孫斗漢要不佞以弁文不佞以癯朽不文辭而不獲則以平素仰德之深著名爲榮僅搆數行以歸之

仁山齋學契序

景陶禹公講道於大德山之上仁里四方儒士鼓篋請益戶屨常滿羣彥以心志契合將修學契徵余一言羣彥之請有不可孤遂援筆徘徊者屢而恐言之無有所補於羣彥也然余於景陶公自許以朋友間知己蓋公之學樸實頭負荷得實地上踐履來其或人不及知己所獨知之際有纖毫未化者存歟是則

吾未敢知而有不然者人之心悅誠服如是之衆而
如是其深非慥慥工夫顯微無間亦何能致此乎世
級寢降儒門之弊尤滋有記誦之學有詞章之學有
訓詁之學有口耳之學有考證之學而尤有可恥者
托名儒門病甚流俗者滔滔是已此於景陶之學相
去遠矣而恐非古來聖賢相授之心法也羣彥乎以
公之學爲學無一毫之虛假以至德合道契則是爲
善學景陶公而楔亦不爲無助第拱而俟焉

送崔可允歸伊溪序

崔君可允將歸隱伊溪之上行且辭於余余曰伊溪

好風水吾旣得詳於子矣第未知子之歸不於他而必於是何也可允曰荷篠長往非吾素志伐檀食力是吾所謀爭名者於朝爭利者於市吾旣無所爭於二者就此不爭之地木食澗飲以終有涯之生而伊川之伊濂溪之溪是所慕也余欣然揖而送之曰子將行矣誰爭子所吾子志周程之學而方且進而不弛其力者也濂溪教人從氣質偏處變化而曰自易其惡自至其中伊川以居敬入手而致知力行以修之子之取伊溪者識其所願學也學之篤行之力寤寐羹羹墻於兩先生則光風霽月繩直準平終有可得

之日矣可允自舞象時從余遊凡言之出吾口而八
乎可允之耳者亦已多矣復何言哉而老婆真慈自
不勝眷眷可允亦皤皤六旬人所造就非不勤且盛
矣其不曰老而好學尤可愛乎夫一身百年之物而
精神在千古成就得此身好則所謂精神者貫徹上
下千古可允勉乎哉顧余八耄垂死無復向上之力
一片心地從以蕪沒棲身之所何暇念及乎然詩曰北
風其階雨雪其霏惠而好我攜手同歸從子于伊溪
之上講太極圖好學論望子之睂睫間而得子不負
伊溪之隱伊溪之靈其肯拍揖相迎我否乎

鄭君光五六十歲壽序

丁酉四月

上之三十四年丁酉四月二十七日卽鄭君晚秀光
五周甲之辰也追惟往昔光五之髡髯垂髮杏其衫
藍其帶遊我研槧之間森森如昨日年光之倏忽如
此顧我老果何如也把鏡自照不覺高笑遂援筆而
題壽單之辭光五自其讀周興嗣文就於余而晨夕
相守唯於步趨唯諾是謹其資性醇厚慤實真有受
器然早孤終鮮家又清寒其祖父母鞠育之勞備嘗
苦辛每向余言其孫成立之難而淚隨言零令人感
惻以是相愛相依如鷦鵬針磁之不欲暫爾捨也於

焉之頃光五之鬢雪千莖華甲載回子壯而孫大舞
彩僊僊父以劬勞之日縱有倍悲之戒子以介省之
筵粗伸飾喜之忱義並行而不悖天理人情所不容
已也夫孝子順孫人家之大慶君享晚年之福如是
其介且景矣則有福者有德有德者有壽必然之理
恨吾老矣其將見君家之益大以昌乎君時時來見
我相對兩衰翁感舊之情自發於言笑之間怡然相
樂忘此身之已老蓋人生百曆卽朝暮耳虛拋一生
於醉夢之中其可曰人乎哉淑身之方承家之道爲
善最樂故曰苟爲善爲可繼也強爲善而已善積於家

慶流於後以是爲貽厥之謨世間何樂可以易此壽
一身於百年壽一家於千世壽顧不已長遠乎哉光
五善人也勿以旣善而自足勿以旣老而自沮益懋
其所已能爲述先裕後之圖是所望於光五遠書以
爲稱觴之祝云爾是日七十三歲守岡翁書

慶州崔氏泐譜序

崔君俊淑將修泐譜袖家乘來屬余以弁卷之文曰
我崔之望慶州者咸祖文昌侯而世代寔邈中間世
系不無審慎雖載家傳舊牒寔無文獻足徵與其牽
合而接上世無寧闕疑之爲寡過自贊成公諱繼雲

以上仍舊存之于首自主簿公諱濯以下別行序次
爲十五六世則雖非大同之譜獨無詳於吾派乎此
先祖梅永公諱孝烈遺誠也余曰唯唯詳其所可徵
不可述其所難徵信而傳信疑而傳疑是爲得正蘇
氏之譜所以詳尊吾之所自出蓋爲是已世級漸降
譜之弊居尤至或依附顯榮攀緣聞望塗入而兄弟
之異親而祖禰之如郭崇韜之拜汾陽杜正倫之祖
城南幾何不倫理舛而人道熄哉譜者尊祖敬宗系
世收族之所由作而管攝天下人心使人不忘本也
夫以一人身而分爲千百人在祖先均是吾子孫在

子孫本是吾同氣念先休之難紹勉後昆之趾美不以己之親疎而親疎之則義率仁攝恩愛相洽譜之派分容何傷乎詩曰子子孫孫勿替引之其欽念哉

講學稷序

甲辰

學所以學爲人之道羣居講習以相輔益故曰學而時習之今羣彥相與修稷而名曰學稷其意美矣心契相合而後稷可修矣顧名思義究極其實可也豈徒聲音笑貌已矣學而不安於小成可以成大器不誘於小利可以立大業得小而自足見利而自銜非所以學爲人也人受天地之中以生孰不知修之則

吉悖之則凶而然生也或非其處學也或非其師或
啓之而戕之者衆罔全其天器而遂失其學焉無惑
乎世界缺陷宇宙長夜矣梁君基韶以羣彥之意來
請一言顧癘廢垂死罔究所言爲學之道布在方冊
講而行之在諸君努力之如何歸而求之拱篋焉

臨齋先生文集卷之十三

記

歸隱洞記

已未

達城府南數十里最頂山下有寒泉洞洞府穹邃巖石磊疊中流一大川川上有泉泉甘而清冽故名之以寒泉余嘗愛其名而書刻于石寒泉西十許里岡巒周遭境幽而勢衍其山可以樵其水可以釣其土可以耕曰雲谷又行六七里斷巖層嶂清流白石曲曲奇絕無一不可意者是之謂梅溪溪上有村曰梅南梅之人多得年有父子兄弟之齡之七八九十者

在在矣嘗往遊焉有一老叟童髮兒齒視眸炯炯殆
不似烟火界中人叩其年其回甲之年卽吾生之乙
酉而筋力尚健矍又不知將享幾年壽甚可異也其
南卽琵琶山之湧泉洞亦有水石之勝昔先師梅翁
之送我行也有詩曰琵琶山中闢洞天龍迴鳳躍湧
靈泉可憐匏繫無因解虛負名區八十年又曰龍蛇
幽蟄自存身桂樹南山夏可人玉洞梅花應不老欲
飛雲鶴去尋春肅齋趙公又書贈梅南二字而有所
期勉是則余何敢當然亦不容不自勉也凡此數地
皆深藏不市之士所可盤桓而永矢不告者而寒泉

也雲谷也兩地名之符契於古其亦不偶然者噫世
相後十有餘載地相距萬有餘里顧今神州陸沉天
下化戎古賢聖杖屨之所盡入氈裘之叢草木淙崢
無復有顏色而迺於東海之東一片鰈域有此名境
者不已幸歟爲後學而學往哲者曷不於此焉韜光
剡彩永爲藏修以自靖獻于先賢哉噫其情亦憾矣
因合而名之曰歸隱洞遂書爲之記

龍石亭記

庚申

全齋先生任公隱居講道于牙之靈仁山下新陽村
其地迺公先墓之下而梓楸掩翳窈然一淨區也中

有縛草數屋潔朗飄灑其一卽所謂龍石亭此何以
稱焉歲戊午冬余自藍田訪於公時雪霰新晴林壑
寥廓寒梅翠竹環擁一室而公危冠袞衣揖迎其間
幽香襲人清標可挹仍携我而登龍石亭亭下有奇
石石之上蒼然而陡起者其巖也公指示之曰此醉
石此卧龍巖此吾所以名吾亭子盍記諸余惟武侯
之爲卧龍而不求聞達靖節之有醉石而樂夫天命
皆以時然耳若公則學周孔之道而蘊經濟之具宜
若出則可有爲於世而乃茲介石之志莫棄東岡之
卧彌堅自甘心於龍蛇蟄而草木羣是其故何哉嗚

乎登斯亭而北望燕雲愴然有千載不盡之恨士君子當滅影窮山抗義自靖爲大明遺民此守身立經之第一義公所以眷眷於武侯靖節而龍石之爲亭名其以是歟然武侯之相蜀漢非終於隱靖節之宰彭澤未始不出公則以武侯之初志葆靖節之晚節非以其瀟虜之醜有甚於寄奴紅羅之裔無有如昭烈者歟公之歸隱於斯亭也審矣昔朱夫子於卧龍祀武侯因醉石而起靖節之祠焉公之受讀於湖上也潑有感於朱先生當日之旨而曰吾有所受云爾

知足軒記

癸未

有人於斯樵於山耕於雲讀於月曰吾足於人之所
不足是知斯人之足於慶足於福蓋天下知足者固
鮮矣掩其貌蠟其言以求媚於世富而不知足貴而
不知足苟苟營營終其身不自足夫孰知斯之爲禍
之媒而憂之囚乎崔允執甫足於人之所不足者也
靜足於動默足於言儉足於侈嘗曰退居林下不聞
世上事是余心之樂足矣讀古人書洗心滌慮是養
性之道足矣四世一家力農貢賦是爲民之職足矣
扁其楣曰知足知足則足自在矣遺有餘不盡之福
以還子孫其餘所餘既已吾知斯人之足足於知

足是為說

靈曜樓記

達治東十里琴湖上南望三峰峯崒其巖然處而偃
樓如抱者曰母峰雙峙列立如左右侍者曰兄弟峰
也友人夏錫圭甫兄弟三人隱居其下而養母夫人
孝其先公教官公嘗有至行蓋以孝友世其家者也
然嘗聞教官公平日旨物之誠得以自盡者蓋亦得
之內助者居多今其諸子之孝友有稱倘非如申國
夫人教誨之如此其嚴歟然則夫人即向所謂巖然
處之母峰而其諸子者乃左右侍之兄弟峰歟靈淑

之氣淳萃其一家焉者可異焉靈曜樓者夫人起居之室是迺里李尚書所命名而揮染者也尚書不輕與人而與錫圭甫遊好且以靈曜二字用替壽嘏之辭俾揭諸萱楮是其意必艷欽於閨範庭模而抑亦勉其所不及以及古人之至者耶錫圭甫嘗要余一言記其事顧不文無以闡發其義而有終不能辭者乃舉其所居山名之不偶然者明其爲母爲兄弟各得自盡其道者以有鍾毓之所由致而百靈輸福七曜降祿將徵其未艾無涯之慶於茲樓云爾

起龍齋記

琵琶一支南走蜿蜒為卧龍卧龍之下翼然而翬飛
者起龍齋卽林氏之書塾也昔朱先生於廬山五老
峯下卧龍淵作亭其上而榜之曰起亭以爲龍之淵
卧者可以起而天行矣起龍之義其有取於斯歟地
相距万有餘里世相後千近斯年登斯齋而豈不愴
然有餘感乎顧今神州陸沉八閩百越盡化為戎則
朱先生當日起亭未知固無恙否而海外一片鯨域
滾阻賈絕車塵馬足之所未到風霞不腥之地有此
起龍齋者何其異哉倘有異時豪傑之士如諸葛卧
龍之起於南陽者歟噫此難與俗人道也二三子其

各勉乎哉朱子之訓曰若彼記誦文詞之末本非吾事之所急而又何足為輕重乎惟此一言足以知所務矣孝悌忠信以善淑其身而家而國而天下矣天何窮心志于雕篆極耳目于藻繪翻弄穿鑿用自眩鬻循區區近小之利而忘其所貴於己者乎況其所循又未必可求乎求諸人未若求諸己務乎外未若務乎內蘊之為經綸發之為事業處則顏巷可樂出則伊傳同歸是其非二三子之所可勉者乎審如是則齋於造士乎亦不為無助而龍之卧者可以起而為見龍矣易所謂利見大人顙不在茲歟若夫憑欄

而岳翠沾衣倚枕而泉聲八耳朝晝烟霞松蘿風月
皆齋之有也而在所當畧不能殫記

永慕齋記

丁亥四月

墓齋非古也古無墓祭何所事於齋秦始起寢於墓
側漢因之皆有園寢起居飲食象生人之具後世習
俗而成禮上墓灑掃薦以時物蓋其緣情而生由義
而起而墓齋之設以之齊服陳食用致潔蠲之誠也
此孝子慈孫之所不容自己者而庇蔭楸栢瞻依卽
隴霜露降而怵惕春雨濡而悽愴愴然而感油然而
慕有不期然而然者此具氏永慕齋之所由作也具

氏吾鄉聞族族氏蕃衍其十世下累代衣履之藏在
道德山下鼎峴洞而斯齋之役卽其先世未遑之遺
志也功旣竣具文汝昌書以記爲請文汝從學院遊
得昇平文兄記其事甚悉奚容贅余言然具氏之斯
舉也出自維則之忠堂構之義非專爲護菊牧薦豆
鉶已耳則其所以慕之道必有以永其世而遠其
謨者夫祖先之於子孫何所願願爲善而已集善來
福福祿無彊子姓之綿聯門欄之昌大於是焉在其
爲慕不已永且遠歟彼累金玉廣田宅而未必子孫
之能守赫勢威粹富貴而未必子孫之盡善矣則於

此厥孫謨之道蓋有所未講者存焉爾詩曰孝子不
匱永錫爾類子歸而告諸諸族而欽念哉是爲記

龜巖齋記

庚子

龜巖舊書院號也書院撤而齋始創地與號因舊貫
也往在戊辰朝令之毀書院也龜巖亦不得免焉
則龜溪四佳涵齋藥峰四先生位版埋安廟址而廟
庭之碑花樹之碣巋然而存地何忍廢荒墓何所羹
墻士林咨嗟雲仍愴惕迺於壬午經始齋役力絀未
就逮至辛卯始克竣功一屋子而堂室房樓間架粗
備費用前後數千鎰可見諸宗苦心效力而學諭公

派居是邑者幾三之一。飲助非輕財好施慕先爲賢之誠能如是乎？是可書也。蕩殘之餘靡有餘力可及於養士之資。前日相聚講習之美，今不可復覩。歟！龜齋之設，豈宜使然哉？夫書院者，三代庠序之遺規也。爲羣居遜業，培養人材，而祠以先賢，瞻依矜式，有俎豆之儀焉。有揖讓之節焉。有觀善之益焉。彬彬多可述。而今後生少年，無有知其說者。雖欲無野得乎？天下買貿不知何樣變弊，伏於其間，甚可懼也。物之廢興，時之運也。循環往復，其有日歟？而猷謀克臧，擴而大之，是在人耳。弗疚於利，弗奪於俗，弗阻於窮，相率

入齋讀書於斯遊藝於斯使門墻不空馨香遠播是
所望於後來云爾

求慕菴記

人之有是身也則必有其所自父母之謂也故曰孝
子終身慕父母推以上之至於祖先以父母之慕慕
之孝之至也苟如是豈止吾身已也下及子孫繼之
無窮吾身亦爲其所慕慕之道不已大且遠矣乎李
君善行自總帥時從余遊好讀書嗜義理早孤而養
偏親孝孝其天植也家故貧能勤儉以致饒而喜施
與旣筮仕而無外慕也則將築兩舍爲瞻依松楸之

圖而問名於余請述其事余惟善行皤皤已老矣而慕父母若嬰兒失哺不能以舉足自忘嗚呼其孝矣非出於一時勉慕而爲之也然則顏之以慕菴可也且有說焉孟子曰五十而慕者予於大舜見之釋之者曰五十而慕則終身慕可知今以凡入之情因物有遷而獨不弭其慕於父母者大舜之孝從可學矣學之不以聖人爲標的則無所望走而之焉耳善行乎苟其慕之終吾身而血氣相輝來之百世仁孝著而子孫昌其爲慕將與斯菴並傳於無窮而我此身之亦爲其所慕者固自在耳第以吾言揭以爲慕菴

之契或可也否乎是爲記

日新亭記

日新亭吾友李君戴堯講業之所也占地高圓通敞
爽豁有湖山之勝有魚鳥之樂而亭之名不以地不
以景而特以日新也者果何所以也易曰剛健篤實
光輝日新又曰富有之謂大業日新之謂盛德湯銘
曰苟日新日日新又日新伊川先生曰君子之學必
日新日新者日進也富有矣哉日新之爲義也大書特
書巨榜亭顏爲顧名愚義之資詎容已也亭中主人
博學潔行進修不倦所造就吾儒家計者已七八分

矣而其心蓋未嘗一日以是自多滌舊來新惟日不
足蘊古知新日復日矣以至德日益明學日益進其
日新之功夫如是矣而亭亦天地間有限一物名則
無窮於百世者其必以主人日新之功有以致之亦
能使主人離塵超俗偃仰起居日於其間得專其日
新之功者亭亦不爲無助亭主相得日有其新則湖
山魚鳥舉爲吾分內物而日相助趣亭名之不以彼
而以此者豈無所以也顧儂日就昏惰無復可望於
日新何當登其亭揖其主清坐移日以講其日新之
功其有日乎亭與主其肯許之否乎亭之間架高深

廣修修創年日功用多小他記備矣略不論著云爾

瞻栢堂記

丁酉南至節

瞻栢堂禹氏丙舍也丙申秋經始其役堂旣成請名於余余曰名者實之華也撫實而名自定或以地或以事或以義於斯三者名惡乎定曰栢田地也爲墓事也二者取其義則三物備矣幸卒以命之曰然則子之一言名已定曰瞻栢堂可耳於古亦有之攀栢悲號非王偉元之孝乎承鉉起而拜曰謹聞命矣願揮灑之用光堂顏焉余揖而辭曰素昧勒趯之妙八耄衰腕強所不強雖欲換鵝得乎旣而書而與之且

曰維則之魚子之世家政天褒之典亦將世矣何待
人勉之詩曰維桑與梓必恭敬止靡瞻非父靡依非
母桑梓以手植物而猶瞻依之矧祖先體魄收藏精
靈所臨乎登斯堂瞻役栢寓慕之無窮焉則自有油
然而生者勿替引之奚用區區者聲言爲哉遂書以
爲瞻栢堂記

東溪遊記

丁酉

東溪在達之西南三十里仁興洞李陶隱鄭寒岡兩
先生杖屨所也寒岡詩願分茅一把終老此江潭者
是已吾鄉之禹都金三家已自先世時修楔置屋爲

誤年講會以爲藥墻之慕蓋士林勝事也丁酉東秋
景陶禹令自聞喜搬還故厓而余亦時寓月村至九
九與諸益作重陽會翌日又作東溪遊一村耆老與
偕芒鞋藜杖緩步相攜仄逕斷阡蹢躅予度一川
越數峴十許里而抵東溪有數間書堂在亂山回合
中卷阿之下前臨小溪溪曲折循除而汨瀟爲佩環
鳴俄而西村都友諸老少繼至凡四十餘人而七耄
至八耄者十人六旬已上八九人未六旬而次差五
四十者半之視古之香社九老蘭亭羣賢未知孰多
少也酒至一舉而止仍辭樓下溪盤石而坐心曠神

怡評品迭發層崖剗壁屏環左右林田稻疇聯絡上
下俯則鑿石窪流滙潭藍碧仰則洞天豁呀亂峰鎖
翠一面奇絕神造鬼剏寔天地化權稍費精力處也
噫地不自勝待人而勝使東溪不遇兩先生則寂寞
泓渟湮沒於空山荒僻之濱誰復景仰之者挹先賢
之遺馥感後生其興懷溪山物色古今無改而吾儕
今日之跡便同雪泥鴻爪後有何人亦猶今之慕古
耶余欲沿溪而上重尋龍門泉石之勝而午飯纔罷
山晷欲頽相與席散步喘息黃昏轉深白日如晝
玉宇淨廓氣象俱空有鴻濛未判底氣像相扶坐草

戲笑而嘲噓唏而歎曰吾儕朝暮人雖欲復有今日
尚可得乎東溪之遊不容泯而無言焉君汝七囑余
記其事余不辭而諾之歸而捫管如隣前塵而說夢
幻事也

孝子朱君

秉夷

旋問記

已亥殷春

歲戊戌秋自上命旌孝子朱君秉夷之間蓋植世
程勵風教之盛典也夫三綱五常扶持宇宙之棟樑
其爲道根於天而行于人昔三粹之所以致隆者惟
是物也我朝之所以媲美三粹者亦惟是物也今
朱君之孝固人子之常行底道理可以責諸人人而

人有所不達何也顧誠不誠何如耳不有天植之誠
神於感應其何以當是名哉疏畦參出醫路虎衛攀
號之廬楸栢為枯拜膝之地莎草不生至誠之感異
常之應君與造化酬酢是則千古僅一二指授矣况
又百行俱美不可以一名掩其平生而褒嘉之典特
著於孝孝以百行之源也歟君朱夫子之遺裔也朱
子編小學書以人倫為本而倫以父子為首君之孝
無媿為賢祖之肖孫君十一世祖漢爽曾亦蒙旌
孝君之善繼述斯可見矣孰謂靈芝無根醴泉無源
哉熊濱海僻邑人恆小之而人之有生固不限乎其

地地不自勝待人而勝朱子生于閩粵而閩粵勝吾
謂熊之擅勝將為君之閩粵君歿未再期烏頭赤脚
炳燬門閭為世人所榮觀而艷慕則地以之勝其不
枉茲歟儒生李燦和與君從侄炫纘謁以棹櫂之記
瘠病淹第無可以揭熙朝廢善之旨而感其苦怨
之誠遂為之書

棲山齋記
丁酉孟春

靈鷲山三峯下九巖之間有棲山齋節度使黃公洩
之攸芋而棲山其號也萬曆龍蛇之變公倡起義旅
自鐘原轉戰南下至于靈山寇退憂無慕於當世遂

乃晦身韜名湮沒無稱君子惜之公之衣履之藏亦在茲區茲區卽公精彩攸被棄樹累遷物不能常於久則齋已墟矣而距公之世今且三百年餘爲其後梟之居於是者瞻依松楸敬止棄梓齋安得不重新乎 當丁壬辰仲春進士鎬與槃秀及諸族協謀殫誠經始其役庀楔塗既闕月告功歸然煥暈依舊是棲山齋槃秀請記其事於不佞癘病淹第甲管久矣辭不獲則乃言曰斯齋之役非直堂構之可述將以護卹墓也亦以薦籩錡也登斯齋者時物之感自不容已而油然而生孝悌之心充此心以去積善植德

留有餘不盡之幅以還諸子孫則源遠之水其流必
長久息之田其穫倍常是其非黃氏之所勉歟棲山
公之所厚望于後孫者顧不在茲歟詩云永言孝思
孝思維則黃氏乎欽念哉

無適齋記

辛丑

辛丑仲秋講會之夕梧月初上竹風微涼族弟伯瞻
散步中庭攝齊而升避席而坐已而言曰曾於遠溪
師門之行拜心石宋公請名書室誦無適二字以命
之願有以發揮之余惟無適一句語學問竝設無以
尚矣主一之謂敬無適之謂一程叔子善形容散底

義晦翁箴曰不東以西不南以北當事以存靡他其
適是乃無適之節度也無適則此心存存則虛靈湛
一一理渾然包括天地洞貫今古以之應萬事而無
差酬百變而不惑此義書以來羣聖賢相授之真諦
也苟或放而不求無乎不適凝冰而焦火飛天而淪
淵奕秋之枰鴻鵠將至易牙之口食味不知將何以
主宰一身亦何爲一心之貞今茲命名之義期勉之
重不于他而必於是者其意豈偶然哉復何贅余言
爲也大書特書常目在茲整齊嚴肅主一無適用收
成始成終之功則第俟月朗風清之夕一入芝蘭之

室望君眉睫間而問主人翁惺惺矣

感慕齋記

辛丑冬

章山北二十里束艸峯下有感慕齋士人全君致坤
侍墓地也君去喪已久而有終身之慕望墓爲齋月
三省墓展省之行手一塊石石積如壇墠盖其事親
之誠出於天植粵自生養之時時其飲食在其寒暄
而於侍湯也亦以慈親之嗜火酒晝三溫進夜三溫
進至十五年不懈且臨終血指能人所不能非誠孝
之篤豈有是乎君今回甲過六年將終餘生於墓齋
瞻依梓楸感時追慕春兩濡而悽愴秋露降而怵惕

惟此身在世之日卽親墓汛掃之辰要盡在己之心
非欲求知於人顧今世如君者能幾人乎而人人盡
孝親之誠如君焉則移孝爲忠三綱立而世道隆矣
奚淑善一身一家而已惜乎其昌黎所謂惟有天翁
知生祥下瑞無時期歟叙其事而記其齋用副警俗
之意云爾

景陶齋記

壬寅

退翁之陶山卽晦翁之武夷也武夷陶山固剖判後
自在地也得兩夫子而名益彰世咸景仰之非以地也
以其人也吾友禹令聖錫甫嘗自號景陶屬余記其

事余惟景陶之景不以武而必於陶者其意蓋有以也武夷之學東漸于海易東先生實有其功退陶溪景仰之今景陶之景退陶亦如退陶之景易東歟徒以私於祖先之故而以其景景之是私一己之景非公天下之道也退陶之景易東非以其道歟景陶之景退陶亦以退陶之心爲心則其景之也不但以號而真心實踐造臻闡域吾謂景陶必不以私而公其道也景陶學道者也老而好學手不釋卷人一己百不能不措義理悅菊豢心性辨毛絲景陶之學術也守身如處子宅心慕古人皎厲矜伐絕於色辭忠信

樸素見諸事爲景陶之飭躬也十年遊宦風霜其髮
六郡紆綬冰蘖其操急流勇退不濡我裳歸身畎畝
懸情象魏景陶之出處也身完名全爲熙世之偉人
非景之以道而能致此乎尤有所不可及者無欲上
人之心是其一生家計謙之一字把作一身元符有
若親受旨設於陶山函丈間而猶恐學而未能每自
點檢於動靜云爲之際噫真景陶者也追以上之景
武夷在是矣景陶於吾言謙讓不居遂書以爲景陶
齋記

夫物之不齊物之情也不齊之中亦有類焉類焉而
不擇眞贋混璞而不擇珷玦銜玉甌而不擇稂莠害
稼鸞鷟欺鳳蘭芝化茅在物猶然而況于人乎擇焉
而不精荀揚之學術也牛羊何擇焉齊宣之仁術也
擇莠而固執之非誠之者之事乎擇其莠者而從之
非三人行之師乎口無擇言古人之言也擇地而蹈
古人之行也朱子且有訓口腹爲饑渴所害於飲食
不暇擇而失其正味人心爲貪賤所害於富貴不暇
擇而失其正理其不擇之示戒深且切矣而擇之爲
義顧不大歟吾友禹君汝七世居仁里榜其讀書堂

曰擇窩蓋取里仁首章之義而心石宋公大書而贈之汝七日於動靜起居之間仰而省俯而思不但有得於擇仁之爲智而其於問學上精微處應知所以擇之之精而有進步地也擇中庸而服膺則顏子之地位可學辨善利於雞鳴則舜蹠之界分可擇以之工夫純熟造詣高明曾次洞豁如河海之不擇細流則包容百垢洽受衆善出類拔萃自立於無擇之地勿以吾言之不擇發而忽之哉

忍齋記

昔張公藝九世同居而書百忍字忍之爲德多矣然

有成數之定名而又有千萬焉豈宜以無限之忍局
於有限之數多乎哉不多也書忍一字足矣何所處
而不當杜君道一名其所居室曰忍特書一字者知
所忍矣君氣定心閒日用百變酬之若無有焉事來
有拂意者置之無所介於懷蓋世間万事恰好於心
者能幾何而忍無時可已君之於忍用力而得力者
固已多矣猶且扁楣而常目之何啻公藝之百忍已
也忍之過而柔弱之弊生忍之積而留滯之病存不
如忍且忘之消而遣却胸中無一物是爲第一義諦
君其勉旃哉

酌川亭記

壬寅冬

大凡物之顯晦在時之遇不遇苟有可遇之實不遇庸何傷乎而終於遇遇則顯非物之幸歟巖山郡之酌掛川固剖判後自在勝閱千萬來年而無少槩見詩稷羣彥亭之而後名益彰吾為酌川賀所遇之有其時而亦賀羣彥之得地勝而亭亦勝矣然在乎人而已苟非其人川與亭雖勝視之不巍眼而僂落下矣奚是有無於當今與後世哉羣彥以詩鳴於時果得性情之正而不失三百篇息無邪遺言歟無是也則酌川亭未可謂有所遇吾為是不能無瞿瞿於羣

彥也川之奇勝何如亭之結構何如規模鋪置之何
如前人之述占據備矣吾何容踏驢跡而添蛇足蓋
眞固境界未之目焉雖欲想像為說不可得矣昔晦
翁借畫五老下流泉三疊安得畫手移來酌川亭一
幅用供卧遊之資酌川靈儻無揮手否耶

瞻楸齋記

壬寅重陽節

人之能久其世世其紫固難矣而非難其事難其人
苟其人天下國家可千万世况家乎哉先從吾身好
則家而好國而好天下可從以好其人豈不難矣乎
金君福洪致五與其再從兄寶洪瑞五起數椽茅棟

于金鷄山道峯下卽其六世祖聽鷄書舍舊址而所謂瞻楸齋是已不仍舊號而曰瞻楸者其十世祖延日公及六世四世衣履之藏在雞山也齋以辛丑仲春成旣而徵記於余而誦其先人遺書且自言其十一世祖栳公與其從祖兄梅塢公遊於沙溪金先生之門當島燹倡義與郭忠翼公公合事載靈川誌雙義錄其四世祖松翁公早有文學名受業於龍潭公龍潭宋文敬公性潭門人而迺我三從大父也其家學淵源有自來矣而致五又從余遊詳聞其堂構於先世遺址善繼述世其業槩可見雲仍追慕之誠而

以此垂裕又將久其世於無窮瞻楸齋傳其久於斯可卜云爾

仙遊洞陶菴李先生影閣記

壬寅

辛丑秋鶴泉亭重新焉壬寅春影閣成九月二十八日先生眞像安奉焉亭之肇創在英廟十四年戊午而先生與從父弟知菴公始以偕遜願遽有存沒之感有詩曰爾言卽一死我欲寄餘生又曰白首同歸約青山獨坐心其眷戀過軸之矢如是真切而中經鬱攸亭亦墟矣今且數百載先生之氣像可儀懔懔之靈與洞天列仙遊從其間安保無其事也先生

之眞舊奉于寒泉書院院撤而權安于胃孫家今移
奉于斯事若有前定者先生當日之志庶幾其少酬
歟然士林衛慕之誠謂以是自多則未也先生之善
言理學栗谷善言禮學沙濱善言義學尤菴諸老先
生授受心法先生得其傳而牖後學於來世為後學
者固宜讀先生之書講先生之道恒若先生之臨汝
於函丈間垂令譽於無窮則今日奉幘之意顧不在
茲乎仙洞與華陽興巖鼎峙相望豈偶然而已哉

東湖觀記

癸卯五月

大小白下素稱多名塢隱淪高行之士往往過輒其

間近古太學生梧村徐公亦其樓中一也梧村嘗
遊定齋柳公之門雅望重當時而其舊居東元之梧
峴有湖巖酷愛賞歲戊戌自丹山還東元而湖巖邇
焉則仍營構數椽未就而逝其諸胤克竣厥功肯構
肯堂其是之謂歟扁以東湖觀者以其地之東元湖
巖而取義於晦翁詩東湖臺觀水雲深之句也蓋人
家之久益昌大不在臺觀在乎其人梧村之哲嗣諸
君蘭馨鶴詩文行世家足以見孺子高風隨處可尋
奚但東湖之久其傳已矣乎噫余與梧村頗頗有歲
寒襟期而轉眄之頃墓艸累宿襟月有感借半華山

夙箒已舛今於相球之邀惠一言筆腐無以勉副則祇記其所感者以歸之云爾

二樂堂記 癸卯十二月

梁君根瑞扁其所居室曰二樂其胤基韶嘗誦其命名之義而曰孟子之三樂溫公之獨樂雖有大小淺深之別其為自已上所樂一也凡夫而就其職分之內不求範圍之外而有書與農之二其樂則有如侯蟲時鳥之自樂天機吾以名吾堂是吾父之志也願有以記之余曰世間万事所樂何限而獨於耕讀樂心焉者非真知其可樂而能如是乎古者士有祿故

曰學也祿在其中而今則異於是書農不可偏廢此
冒黎所以美董生之朝耕夜讀也粒粒辛苦不以為
勞矻矻窮年不以為惰樂其樂而名其堂不其宜乎
又有大者孝友之行好施之義君之家政克世其久
是可書也君來此相守已經一序而鹽蘊土供饘粥
糊口歲暮雪屋書聲金石是比省君善於繼述真樂在
是皆可書也記如是足矣奚容浮辭溢美為哉

先德齋記

乙巳正月十六日

梁君聖淳築讀書之室于龍角山下先德之洞功既
竣請其名而記其事遂錫嘉以先德先德地名也而

允副君進修之基周鄉三物一曰六德孔門四科德
行居先德行本也文藝末也先本後末知所先後是
為吾儒家第一真詮蘊諸一心潤於四體著乎百為
學者之務孰先於是徒以出入於四寸間者為吾事
已足則是口耳之學非吾所謂學也噫人生世間有
曆卽朝暮耳固當洗去一切血葷遊心於昭曠之域
尊德性道問學知行並臻而讀於斯誦於斯顧名而
思義則先德之名不為無小補於聖淳而在後承紹
述先世之德將无窮已是亦先德之一義也於其行
書以贐之

耕讀窩記 壬寅

士不得於朝則野在野之人書農其職也然迫於飢
耕或不期而自力讀則循名而無其實何哉口腹之
欲勝則義理之心薄薄者集於勝固其所也然則兩
者俱不可廢而尤可力者讀也聖人有訓曰謀道不
謀食曰憂道不憂貧每拜舉而示其輕重之別野處
之人不容不稼講此義也昔舜之聖焉而耕於歷尹
之任焉而耕於莘皆道在身身存則道亨置身於耕
稼之中將以行斯道於萬世也今以衆人固未敢擬
議於聖賢分上而但淑善其身藏器待用其道在書

讀何嘗歇后於耕哉宗人璨欽扁其室曰耕讀璨欽
有志人也於耕讀知有輕重之別焉則不但於其身
而勉之勉之于雲耳不以口腹之欲勝義理之心德
潤於身富潤於屋可庶幾於世世矣然而累金玉廣
田宅以遺危於子孫孰若教一經識道理以垂裕於
後昇哉君其勉乎兩全而亦知輕重之別是所拱竢
焉

八水亭記

甲辰

亭以八水爲名因四佳先生詩四山圍郡去八水抱
村流之句郡之故號爲八溪亦以是耳昔朱夫子居

園中而不忘新安之紫陽榜其讀書之室今不忘祖
先而亭於斯烏可已也以之名亭而寓慕焉者豈偶
然哉蓋先生文章德業之盛振耀一世杖屨所臨山
川草木皆有精彩在餘人尚云懿仰之無窮矧伊後
裔之居是郡者其志豈徒以亭爲觀美哉相率以正
世趾其美不墜詩禮家聲是其第一義諦千章之木
枝葉蔽天以其有根厚也萬折之水派流散地以其
有源遠也不有祖先之積善餘慶而能子孫昌大者
乎亭之兒郎在庚子酉之月而仁輔甫與其諸族殫
竭心誠克竣厥功亦無愧爲賢祖之肖孫歟

臨齋先生文集卷之十四

跋

溪東集跋 己未

右溪東先生集一部乃其門人孫慕堂所裒輯於斷爛之餘者而其旁裔致賢甫近得疏三篇於霞堂李氏之爲先生彌甥家并謀以剞劂屬不佞編摩要綴一語不佞蔑學曷敢當是役哉辭之固而終不獲則序次大畧遵慕堂所定而又安知銀根枇琶之或無其舛也竊以是懼焉蓋先生修之於身而行誼純潔爲政于家而恩義互濟榮名朝端盡忠諫之言飛鳥

西郡勵冰蘖之操已有并世諸賢所極口稱賞悉心
贊述是則先生有百世可傳之實而泯滅不得者也
寂寞斯篇之能獲全於閱累桑劫之後若有冥護然
者豈無以耶嗚乎不佞生晚先生之鄉且三百餘年
所每雲谷寒泉之行歷過先生舊墟邈乎風韻無跡
可尋而但山若增高水若增清彌不禁景仰之懷今
而託名卷端用效微悰不其與有幸歟遂書之如此

題孫藏帖後

屠維協洽復之初吉家君於枕上得忠孝家謨耕讀
業八箇字益若有人叫呼而授之恍然如眞夢間

者而時則高槐碧松曉光濛籠起念誦數回待朝命
贊奎書諸帖斯事也奇而偶然抑祖先之靈造化
之神有以冥佑而默禱者歟卽此八字而於心身家
國天下之道已盡之矣克世傳述用彰厥功其爲福
當有無窮旣矣視王氏青氈蘇家龍硯爲後子孫珍
不珍何如哉以身守之圖惟永遠因以課忠責孝力
畊勤讀俾作我家世嘉謨是家君所厚望于後孫者
後孫乎其欽念而毋忝哉是日子贊奎謹書

書秋溪秋氏闡先錄後

余嘗愛露堂秋文憲公明心寶鑑其爲書盡蒐輯前

修格言而蓋出於公平生服行之餘觀於安文成舉
公爲國學教授彌可信焉然古之人積仁潔行夫如
是矣而雲仍之零替不振無聞於世抑獨何哉秋君
秉紀文求相托抱其家乘數局過余於守東齋略綽
披閱見其累葉事行歷落在中而露堂公之倡明儒
教爲世標準旣如彼雲心公之贊 皇明創業之謨
洗心公之樹壬辰東援之勲俱卓卓可述焉近又秋
氏樹石先墓躋享四祖 皇壇叅班合貫修譜并與
家乘心鑑壽梓之其事則美其誠則勤夫然後秋氏
幾百年泯晦不顯之蹟一朝彰明耀人耳目靡世文

苦血詎集事乃爾其中闡先題名錄者當世儒賢擇
紳章甫之爲秋氏闡幽之圖者別錄姓銜合一卷而
名之者也載名諸公之皆樂爲言不休一以闡發爲
意者蓋亦仁人之心而秋氏之爲是錄者亦惟餘誠
於爲先感公議於當時而爲別例尊閣之義歟噫世
趨靡靡質公偽滋忠所以顯其先者求諸人而不求
諸已務其外而不務其內漫辭虛歸喚做別樣形跡
易眩而心目難欺者是宜所兢兢也乃若秋氏則露
堂洗心之德學勲業在矣心法相禪持作傳家長物
惟敦本務實之是事惟砥行立名之是勉則秋氏之

門將自此昌大而安知不爲東土之赫世顯閥哉譬
諸水有星宿之源而成龍門砥柱之屹有岷嶓之源
而成彭蠡中江北江之盛豈有有其源而其流不汪
洋浩淼者乎世文乎其以是復於諸族可也遂題于
下方

題英安全公霽實記後

庚辰

右英安全公實記一編其後人捃拾於斷爛之餘者
也公之著述散佚無傳獨詩與書各一頁得免燹燼
而亦可以想像其忠憤激烈慷慨當日之事嗚乎公
之此詩在今日不可不讀之也島夷漫不可和奚獨

當時爲然古今志士之恨誠有不勝言者此詩在則
公之實記於斯焉足矣復奚用多文爲哉嗚乎龍蛇
之變尚何忍言方其封承長蛇猝肆癘毒握節腰符
者皆望風奔潰無敢殼一矢向賊而公時宰靈山當
賊路要衝於是倡飢羸散亡之民衆不過數百而乃
能抗幾萬慄悍之賊於泊津鼎巖之間者卽張巡許
遠蔽障江淮之功以是忘憂郭忠翼公許以出天之
忠兼人之勇又嘗書應募錄曰全某入城軍中如見
父母及其協隨天兵所在先登則人皆加額而相告
曰敢戰將來蓋公英毅勇敢之特半壁東南倚以爲

長城而愜人猜克卒逞其毒公遽殞于軍中嗚呼其
摧鋒陷陣之偉功茂績眈眈不彰至有慕亭裴公大
維上疏訟公冤當時士大夫倡義殉國者靡不功紀
旆常圖像麟閣而公則未之抑獨何哉其亦有幸不
幸歟然而赴君難死國事是公素所蓄積當時之榮
後世之名於公何輕重焉公之後孫奎煥錫龍甫示
以公實記要不佞一言言淺人輕敢辭不獲則開卷
第一詩特有相感者存遂援筆書之以諗夫天下後
世忠憤義氣之士云爾

書崔夫人孝烈錄後

孝與烈性於天而職於人人之職其職而無違乎天者始不負人之名而然千古鮮卓卓人人之盡其職蓋亦難矣哉既難矣而又鮮焉則今之人曰孝曰烈舉世滔滔何也甚則至於欺君親而烏頭赤脚炳朗門間真贋混淆珷璠互眩苟有其實而欲闡揚之者只當求當世君子之立言以俟百世公議亦庶乎其可也歟余淹病雪屋螢乾蠹枯萬緣禪空適金鍾國士聲甫自湖西來以孝烈錄見示其先妣夫人慶州崔氏固已有卓卓之行而并世諸賢稱述歷落在中若李素山應辰金重庵平默諸公皆同門舊要其言

尤鑿鑿可信夫人以文昌侯爲祖而月城金公諱在
光其辟也在室而爲孝女已嫁而爲孝婦夫死而爲
烈婦諸賢之述其說詳矣余何贅焉然夫人之死後
公七年之遠何哉於夫人心不已久乎其裁心處義
曰吾有所受矣乎婦人有三從之義夫死從子子在
而從夫死豈義之中也哉鞠育遺孤使五世之宗有
托乃未亾人之責而長逝者之望則夫然後從心所
安因時處義是亦義而已此夫人之心不以七年爲
久而其矢死一念七年如一日權而合經義而得中
如夫人者能幾人哉大丈夫猶難而況於婦人乎宜

乎士聲甫之欲顯其親而求當世之言以俟百世也
然士聲甫於尊周大義講明熟矣亦當從事於求仁
爲己之實則立揚顯親於是焉在何必求諸人爲也

野軒實錄跋

壬子

記余童丱嘗竊聽於長老間其論達之詞章家必并
稱橋項金氏蓋金氏之居橋庄累其世而文行多有
端士讀書懷獨不出郊坰循分任真不事近名野軒
處士金公乃其一也處士道州人麗朝平章事英憲
公諱之岱之後端敏誠慤得於天性在鄉黨辭氣和
藹禮祭恭穆於事親忘物之養靡或不極居憂則羸

毀斯歟而口不近董桂跡不履中門葬祭之節誠文
備至值國恤食素寢外每國忌行素三日其內

行如此外於此者可類以推得早從學於贊奎三從
大父龍潭公之門受四子諸書又追遊於鄉之名碩
磨龍君浸灌多所進益苟通舉業文名夙著一時儕流
皆慕與之交累魁鄉解赴南省而連不得志於有司
此其得失固不足加損於處士而在人之知處士者
亦不無慨惋於當時也訓子以義方嚴督課程不使
少惰其子斗尚之文詞蔚然得陞上庠人稱處士積
勤之功也晚擬畢命林泉於金鷄山之下架得數間

屋子峙書左右嘯詠其間近遠學徒之鼓篋請益者
餘百人授課肄業之暇又以山巾野服逐隊田翁野
客爭座於野草莽蒼之間課農問圃陶陶以爲樂處
士之號野軒義在斯歟噫使處士而得展志業則其
所就豈不卓卓乎哉而惜乎終身隱淪無有著布使
世之知處士者不過曰科目之士而已嘻亦末矣若
徒以此而蹟處士則豈非淺之知處士耶今其孫孝
坤抱其遺事涉雪款扉以狀見屬余惟言淺識蔑罔
克闡揚且人狀德如模倣一毛髮不類便是別樣吾
爲是懼勤辭再三孝坤知不可彊又以跋文爲請詎

在同開率無以并此爲辭特舉其大致如右若使言有所浮莫無有損於處士謙牧之素志耶故寧略而不敢詳姑書此以俟能言之士云爾

題平壤圖後

平壤箕子國而古檀君所都也屈茲四千餘年之間江山依舊臺郭不改此固一寓目可模若其物換人非風漓俗遷凡幾劫歟是豈衆形而可寫者耶東方古無君長有桓因生雄雄生檀君檀君以堯二十五年立國於平壤今江東有檀君墓檀君生扶婁禹會諸侯於塗山也扶婁往朝焉其後商亡而箕子至詩

書禮樂巫醫卜筮百工技藝皆從焉立八條之約而
敬禮義務農蚕設井制今舍毬門外縱橫四區區皆
七十畝者非殷人助法乎其俗重禮讓敬鬼神婦女
貞信黎民樂業歷衛氏至高句麗尚武勇好勁悍此
其大較也自麗氏及我朝近千年來爲國之西藩而
民物謠俗猶有箕聖之遺風云昔於龍蛇之變皇明
李提督破倭賊于此基我再造之業今 上丙寅璫
齋朴公剿洋舶于涓江威名動天下此其古今之蹟
班班可述而非繪畫所可盡者夫畫者無聲之文文
者有聲之畫畫以著其形文以盡其意茲撮其要以

盡難盡之意而若夫樓榭江山之爲東國第一擅勝
有盡在可按而知也

家藏筆帖跋

癸巳

昔先君於寢夢間得忠孝家謨耕讀世業八字命不
肖書帖以傳後而僅成屏書一本書帖第竢筆進邇
來近四十年屏亦弊而無傳焉嗚乎先君之志不在
文字空言之間蓋欲責其實於世世子孫而不肖無
狀猶傳不及身矧伊望于後能得其久遠乎哉日甲
孫磨墨數升橫管藤面舉先祖之志以請顧餘日無
待仍強腕成字語于孫曰字墨之跡有限謨業之傳

無窮非要字好聊以敬傳今得傳之孫矣爾又得傳
爾孫若吾之面傳於爾永遠之圖其在斯矣勉守之
書五本傳三孫二子題語而起時則竹風送清塘魚
躍波

鳳村集跋

右鳳村先生集故太學生崔公象龍著也著書士之
有志而不遇於當世者之事公求道之志已自早歲
其志可謂勤矣而不有遇於當世抑獨何哉憾矣夫
公嘗師事立齋鄭公公期詡公甚重又遊從於梅山
洪先生先生亟稱公經術公之爲公斯可見矣今之

學者有三循名亡實假學也拘於言詮口學也和光
同俗愿學也舉世滔滔與之俱化由是能爲君子儒
者蓋鮮矣公兢兢乎身心交養足目俱臻大肆力不
息於六經諸子百家罔不研其精而覃其思爬其焚
而剔其繁往往濫造自得默契竝悟經書八圖四書
辨疑是公平生精力羽翼斯文底有數文字而若乃
依違於四七之辨出入於湖洛之說百世以俟隻眼
者定詎容一槩論也公之孫永煥以不佞同井世好
要出一言辯不獲則記昔不佞學未知方亦嘗被公
愛與而期勉之者多矣其何能忘亦何忍辭然靡廢

垂死螢乾燼枯口噤筆腐無以闡揚其二噫藏澤
之珠自媚蘊櫝之玉待價公既無所遇於今必有遇
於後鳳村先生遺文不在茲乎不佞何憾焉九幽之
下公應莞爾而笑

題鄭逸史泰源遺稿後

觀人當觀大體大體既立區區文辭之末有不足論
己余觀逸史遺稿至斥邪文一篇擊節歎賞久而不
能釋手噫斯人也於邪正是非早已覩破無遺其道
術之辨華夷之分人獸之別卓卓其見鑿之中敦謂
之今世間有數文字未有過也顧今天地純坤蹄跡

交尋人之見此文而知之者固鮮矣知之而好之者復幾人宜乎廢棄無所容矣而曰局於地則未也歸以藏之以俟復陽消息庶乎其可歟不有遇於今必有遇於後而遇不遇亦何與於當人哉嗚乎唏已

題金君家範後

國家盛際陶鑄作成之化旁流溥洽人皆以詩禮爲恭飯行檢爲被服微此若飢寒之迫而不能一日生也觀於金君孟訥家範一編可知己家範者範一家之衆不先範其身而未有能範物者也余故知斯人也有大過人者而非鄉黨間自好者所可企也傳所

謂正心修身而齊其家者歟其言言契緊句句切當
本於躬行根於心得決非取辦於筆舌間者詎但行
之一家推而廣之可以醫世而範俗當時士大夫至
庶人在官者日用事爲罔不以正兢兢乎喻於義不
喻於利教化之隆風俗之美斯可觀矣而俯仰之頃
世態百變更不聞彝倫禮義之說行於其間彌不勝
世道人物之感焉其子在鳳亦善繼述人稱生佛佛
者用心善也有是父有是子之名湮滅而無稱悲夫
其五代孫尚鎰自灑掃應對時從於余示以家範邀
惠一言顧瘠朽何以闡幽爲後承者惟祖訓是範祖

先之所望於後承者在是耳詩云毋念爾祖聿修厥德勉旃哉勉旃哉

書公洛會遊錄後

己亥

古今人爲山水遊者必有錄焉爲其蹟不泯也然張皇其景物誇耀以文章畢竟爽其實而喚做別地風光於勝其事久其傳何所益哉取好於它以勝其事不如先自吾身好其事自勝然則勝遊之久其傳不枉山與水而抑有在耳夫洛南國之紀公中岳之宗夏而舟秋而山所與遊多一時之望而爲異日之慕者也走與同周旋於其中不已榮且幸歟昔我傷先

樂齋先生有壬辰倡義於公山有辛丑般遊於伊洛
當世同德諸賢之同是會者風韻精彩至今赫赫在
湖山寥廓之間尚令後人有山仰景行之感今日之
遊必於是焉者非以是歟今天下一大變局也好古
而不泥今日之以迂濶時務覩遠而不求近歸之以
空疎無當噫得此題目不害爲韜先剗彩之圖任緣
適志自放山水盟鷗鷺而佐麋鹿天之享此福樂不
其厚矣乎哉同是遊者前後各八十餘人詩合編以
上下各署名姓畱作卷中人

玉山全氏族譜跋

王山全氏世譜今此四修焉蓋三十年爲一世世而譜不修奠世系辨昭穆將惡乎施也宜全氏之汲汲乎斯役而不容少緩也以自麗來門之盛如其赫赫而賢澤寔邇耳雲漸替程子所歎無百年之家者奚獨枉昔爲然然感衰數之莫追者而衰者感之兆也疆爲善而已苟爲善而無位祿雖衰猶感也有位祿而無爲善雖感猶衰也寔能義率仁攝九族旣睦述先燾後宗哲相禪全氏之門安知不昌大於永世乎吾鄉儒術肇自溪東先生駸駸葭灰管動先生倡學之功迺吾鄉之周茂叔也光靈見想至今不泐不

倭詎敢辭一言於斯譜之修乎謹爲之說如是云

書崔和集孝行錄後

士寅

夫以堯舜則天之道曰孝悌而已者天道生生人道親親其義一也人之孝親之誠惟其所當爲無過分之事所以盡人道也盡人道盡天之道在是也孝豈易言哉舜文武周曾閔尚矣下而著在傳記表表可稱者指不勝樓而此千古萬千人中僅一二也何多之云乎哉我朝以三綱五常爲扶持國家之棟樑化行俗美忠孝之盛前史所罕閭井之間尋常人士亦有一點明處是其五百年致治之器仗以是之故

稱人之善非忠孝字知無善可稱實亡偽滋安保其
流之無弊耶孝云孝云非爲弊也求爲人知是其弊
也求爲人知則非孝而曰孝者時或有之於是乎實
有至行者人不以貴也豈非可懼耶崔鳳實和集實
行人也以孝世其家事親也旨物之養備極其至至
有冰鯉之異遭憂也廬墓三年而有虎馴之感是乃
並世而耳目之其胤駿鎬亦嘗從余遊而聞其所未
聞余嘗病世之人求爲人知者之爲弊而懼其實行
者之同歸於不以貴也力疾而題其後如是云爾

書鄭孝子行錄後

有曰仁者人也親親爲大蓋親親之道莫尚於孝孝是生于仁而行乎仁非有二也故聖門教人尤眷眷於仁孝之道者其以是歟嘗聞吾鄉月朝孝行之稱以鄭門爲拇龍大寬植乃叔乃姪俱以窮鄉食力之家非有詩禮濡染之資而於事親生死葬祭罔不以禮鄉黨之間交口稱善各執一譽各殊其辭有若古人百美咸萃一身設或浮實之譽人言易溢槩想其人天植之行有大過人者而素所孚感於人固已久矣今按狀行質而無誣辭皆人子職分上常行底道理隨事申當動合前人者也若認以収拾其糟粕而

臣看方志卷之二
卷之二
不究其實地上踐履則豈非淺之爲知也耶蓋其資
質之美不失秉彝之天而盡人道而行乎仁者也是
豈叔李所易見而易得者乎至誠動天 貤贈追榮
逢藿照曜詎但一門之盛事抑亦爲鄉閭之光爲人
勸植世程詎可無所補於風化也哉其孫壽煥以余
同井要一言發揮顧癘淹神隕無以副其勤意略以
數行語題其下方而歸之

題李載重金剛錄後

天下名山固多矣而窮天地造化之秘金剛最焉惟
其僻在東偏古今天下人足跡未曾一躡躡則知吾

言之非誣也吾友李上舍載重多聞博學士也襟期
爽朗俗諦無累寄情物表遊心象外乃與徐生相春
筇杖而往以盡其環觀既歸示以一帙錄凡金剛萬
二千峯擡來一筆上恍然坐我於毗盧萬瀑之間蓋
其千態萬像盈視駭矚說之而口呿筆之而手澁有
不能萬一其彷彿而往往評品善形容逼真者載重
之標致逸韻與靈區仙境暗相邂逅以之心融神會
模寫得盡如是其到底歟人於山水記遊非役於景
物必騁於文詞而載重之錄有若覩得其流峙動靜
之奧有所樂者存諸胸中將與金剛造臻造化無窮

之缺是所拱俟焉金剛余所願遊而老且病矣今於
載重之錄卧遊焉足矣是爲說

書金君鍾潤遺稿後

嗚乎此秋岡金君鍾潤所著也一羽於鳳而窺班於
豹歟君面上之草屢宿而早已從太清僊侶遊造化
於無窮歟魁偉之志磊落之氣何處復得來也寂寥
殘篇遺落世間者無足有無而猶可以得君之糟粕
歟其爲文不修辭搢美而知者知之於言外猶足以
不朽君歟君善書藝入爭珍翫而轉眄之頃無非陳
跡古今人事之茫然固如是也君之志業有未卒之

歎而嗣子在烈在煥之爲人將以見碩果之報遺文
之傳不傳不在茲乎顧瘡醜筆腐無以闡發祇書所
感於下方以歸之

書孺人慶州崔氏行錄後 壬寅三月三日

一與之齊終身不改斯乃婦人之烈也然不改之中
生死異途生者人恒易之死者人恒難之故世之稱
烈者不於生而必於死噫其惑也已有曰婦人有三
從之道在家從父適人從夫夫死從子不言從死而
直言從子者非與其必死之爲烈不死之非烈也蓋
死者人所甚惡惡且爲之非不爲高人一等之行而

臣有文集卷之三
究其情則憾矣或青年無所歸或無子無所從棄於
迫切之情以致溝瀆之諒夷考其中正之義則百不
一二焉今孺人平常盡婦之道臨病極扶持之誠
而不幸值晝燭之哀則貞信自守俯而從子持危
之宗保香火之繼遂遂光陰遽享老耄而未亡之寃
未嘗須臾遣去心五十年如一日及其夫子夫日既
厭旣肱整席而逝噫此蓋袒括當日之志而任造化
之命就從容之義豈或諉之以適然哉吾謂不改之
烈死生雖殊而生或重於死也

題筆帖後

右兩頁書補近齋先生所與任公靖周書也祖甲孫以素幅一冊要書蓋其意欲以祖先手蹟藏以貽後非專為其善也顧八耄精神何能副其意耶然亦不得不為耆垂死之境子孫之言自然易從故也壬寅菊月乙酉同甲祖書

書先師梅山先生經禮說後

先師經禮論說散載知舊門人書牘中編帙浩穰有難臨事講考欲刪煩類輯同門長德蓋嘗有志未就耳贊奎不揆僭逾就全書中選彙為十九卷而顧膚淺有或未盡善於其間為是之懼戢弄巾箱以竣後

日矣先生嗣孫用觀時牧永陽郡送示禮說寫本四冊曰此湖中諸賢所效力而未及廣考全書幸有以照勘焉謹受而讀之漏不見載幾三之一焉亟欲合編嶺本以補其闕俾完成書而馳書未達印役遽行可勝恨哉然禮說既經諸賢校正尚幸據以爲取重之道初欲合編時旣一從其見成規例則今亦仍之拜經說合成十冊而從余遊者李善炯將繡梓嶺本以壽其傳黃商伯之刻語孟要義皇甫斌之刻易傳皆古人風義自有其人矣翹慕先賢惠後學之爲美哉蓋老先生道學文章之盛槩於遺集窺豹斑矣經

禮之論不過隨人答問上酬去者則何以盡其全體
大用也若以爲取足於此而可則非所以成此書之
意之也嗚乎先生平日眷眷以衛正學扶世教爲已
任今先生之歿四十年餘而世故人事嬗變如是是
書之刊適在是日其有不偶然者存歟道日中天庶
幾其有期歟集羣儒而大成獨結局於斯文先生之
後不復見先生歟嗚乎唏矣

臨齋先生文集卷之十四



